

Registered at the G.P.O. as a Newspaper.

Te Toa Takitini

Te Utu mo te Pepa 10/- i te tau,

Ki te tuku moni mai mo te Pepa me penei na "Te Toa Takitini"
P.O. Box 227, Napier.

Ki te tuku korero mai, reta ranei me penei na "Te Toa Takitini"
Box 300, Hastings.

2194

TE TOA TAKITINI

Tihema 1, 1930

NGA MIHI KIRIHIMETE ME TE TAU HOU

(Na te Pihopa o Aotearoa)

Tena koutou nga iwi o te Motu.

Tenei to koutou matua, to koutou Pihopa pononga te mihi atu nei ki a koutou katoa i roto i te Ra-whanau o to tatou Ariki, me te Tau Hou e takoto mai nei i mua i o tatou aroaro. Tena koutou oku rangatira o ia hapu, o ia hapu, o ia marae, o ia marae. Kei te tangi tahi me koutou ki o tatou aitua o te tau ka huri, kei te hari tahi me koutou mo nga manaakitanga i a tatou, i tae pai mai ai tatou ki te taumata e marama ai te matakitaki atu ki te tau hou e haere mai nei.

"Ka mea nga hepara tetahi ki tetahi, Tatou ka haere ki Peterehema." To ratou taenga atu ka kite ratou i te tamaiti i te Kai-whakaora mo te ao. Te whakamaoritanga o te ingoa nei o Peterehema ko te Whare o te Taro. No reira i tika ai kia haere a-wairua hoki tatou ki Peterehema i tenei ra, kia kai hoki tatou i te Taro o te Ora.

E ki ana te kupu mihi a te pakeha "Mere Kirihimite, Hapi Nu Ia." Kia pena ano te mihi ki a koutou katoa, me a tatou tamariki, puta noa to tatou rohe Pihopatanga Maori. E pumau ai enei manaakitanga, ma to tatou kaha ki te hopu mai i nga akoranga wairua o tenei ra. Tena koutou katoa, ma te Matua i te Wahi Ngaro koutou katoa e manaaki e arataki e whaka-whiwhi ki te Ora mo o koutou tinana me o koutou wairua.

TE WA O TE TAU.

He nui nga manaakitanga a te Wahi Ngaro i a tatou i te iwi Maori i tenei wa hurihanga o te tau.

1. TE UNGA MAI O NGA WAKA I HAWAIIKI.

E ki ana nga kupu a nga tohunga: "No te kaupeka o Tautau-urutahi ka maanu mai a Kurahaupo i Hawaiki (ara i Rarotongā) ka rere mai ki Aotearoa nei. Ko te aranga o te tau o te Motu nei he hauauru-ma-tonga. Ko te kupu a Kupe i